

**ANG****Bayan****Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo**

Edisyong Hiligaynon

Tuig XXXV No. 14

Hulyo 21, 2004

www.philippinerevolution.org*Editorial*

Nagalala ang pagkahamulag sang rehimeng Arroyo sa pumuluyo

Padayon nga nagakahamulag sa pulitika si Gloria Arroyo bangud sa iya garuk kag brutal nga pagginahum kag sa nagalala nga kahalitan kag kaimulon nga ginatuga sa pumuluyo sang wala kutod niya nga pag-ikog-ikog sa imperyalismong US. Indi madula ang daku nga duda sang madamu nga pumuluyo sa iya pagdaug sa eleksyon. Ginakaakig sang pumuluyo ang pagtapna sang rehimen sa mga pagpahayag sang protesta sa nagligad nga tuman kahigko, pinakamada kag pinakamapintas nga pinili ay sa bug-os nga kasaysayan sang mga reaksyunaryong eleksyon sa Pilipinas. Labing ginkaakig sang banwa ang paglapak subong sang rehimen sa interes sang hustisya kag sang pumuluyo para sa pagkakig-"rekonsilyasyon" kanday Estrada, sa mga Marcos kag iban pa nga ginhusgahan na sang pumuluyo bangud sa ila mga makangingil-ad nga krimen batuk sa banwa.

Adlaw-adlaw nagadamu pa ang pumuluyo nga nakumbinse nga tuman kadaku nga pabug-at sa masa ang pagpadayon sa daan na nga mga maka-imperyalistang polisiya sa ekonomya nga lubos kapagsik na-

man nga ginapatuman sang papet nga rehimen. Nagserbi lang ang mga polisiya nga ini sa mga imperyalistang kumpanya nga dalok sa supertubo. Ginakuga sini ang mga lokal nga negosyo, ginaguba ang mga produktibong pwersa, ginabayaan nga atrasado ang pungsodnon nga ekonomya kag pinakamalaut ang kaimulon sang pumuluyo.

Ang neoliberalisasyon kag katuwang sini nga pagbaha sang mga ginangkat nga produkto nagasampaw sa mga lokal nga produkto ang resulta lunsay sang labing pagtibusok sang lokal nga agrikultura kag mga negosyo kag sang lapnagon nga disempleyo kag kaiwaton sa bilog nga kapuluan.

Ang mas malala nga laragway sang disempleyo kag pagkabangkras sang ekonomya sa Pilipinas nabuhinan lang sang pagluwas sa iban nga pungsod sang masobra walo ka milyon nga Pilipino para didto mangita



trabaho.

Ang layi sa deregulasyon sang industriya sang langis ang rason sang wala untat nga pagtaas sang presyo sang mga produktong petrolyo kag libre katama nga paghugakum sang malahigante nga tubo

***Mga tampok
sa isyu nga ini...*****Pagpahilway kay Angello dela Cruz**

PAHINA 3

Madinalag-on nga depensa sa Samar

PAHINA 6

Rebolusyonaryong hilikuton pangkultura

PAHINA 8

sang mga multinasyunal nga kumpanya sang langis.

Ang deregulasyon kag pribatisasyon sang mga basehang serbisyo ang yara sa likod sang wala untat nga pagtaas sang sukot sa kuryente kag tubig, serbisyo sa ikaayong lawas kag pang-edukasyon.

Sa atubang sang tanan nga ini, hungod nga ginapabilin sa pinamanubo nga balor ang suhol sang mga mamumugon kag sweldo lunsay sang mga empleyado sang gubyrno kag pribadong sektor. Hungod man ginakinutan ang gastos para sa mga basehang serbisyo bilang pagsunod sa kagustuhan sang mga imperyalistang ahensya. Plano pa nga labing pugaon ang pumuluyo paagi sa pagpanaog sang dugang nga mga buhis, santo man sa dikta sang mga imperyalista.

Ang pagluhod-luhod ni Arroyo sa iya imperyalistang amo sa halambalanon sang ekonomya makit-an man sa bulag niya nga pagpatuman sang "anti-teroristang doktrina" sang gubyrnong Bush sa Pilipinas. Bilang "ikaduha nga patag-awayan" kuno sa "anti-teroristang gera" nga ginaduso sang US, espesyalmente ang gubyrnong Arroyo sa Asia bilang pinakamatandos nga taga-

suporta kag tagapatuman sang tanan nga antinasyunal, kontra-pumuluyo, mapiguson kag teroristang polisiya kag tikang sang rehimeng Bush sa Pilipinas kag mangin sa lawas sang pungsod.

Sa lubos sini nga pagluhod-luhod sa imperyalistang amo, ginapabay-an sang rehimen ang US nga abusuhon ang pungsodnon nga soberanya, lapakon ang pungsodnon nga teritoryo, himuon nga base militar ang bilog nga Pilipinas kag pasilabtan ang mga pangsulod nga halambalanon sang pungsod. Ginatawag nga paghanas-militar ang mga operasyon militar sang mga pwersang Amerikano sa mga lugar nga ginapuguran kuno sang mga "teroristang Moro."

Sa ngalan man sang "gerang anti-terorista," nagapadayon kag malaparan ang mabangis na operasyon militar sang mga pwersa sang gubyrno kag wala untat sa pagsabwag nila sang terorismo kag paglapas sa mga tawhanon nga kinamatarung sa mga lugar nga ginasuspetsahan pugad sang BHB kag MILF/BMIAF. Ginatuyo man nga pasudlon ang mga pwersang Amerikano sa mga rebolusyonaryong erya.

Para ipakita ang lubos nga pag-

ikog-ikog kay Bush, nagpadala ang rehimeng Arroyo sang 97-katawong *humanitarian contingent* bilang suporta pangpulitika sa imperyalistang okupasyon sang US sa Iraq. Sa numero nga ini, 55 ang tropang militar.

Ugaling gintay-og ang rehimen sa pangpulitikang implikasyon sang pagbihag sang mga militanteng Iraqi sa mamumugon nga si Angelo de la Cruz. Napilitan ini nga paulion ang mga tropang Pilipino.

Nahibal-an ni Arroyo nga mas ginahatagan gihapon sang bug-at sang iya mga imperyalistang amo ang lubos nga pagluhod-luhod niya sa pagpatuman sang mas importante nga polisiya nahanungod sa "globalisasyon" kag "gerang anti-terorista" sangsa pagkadula sang simbolikong presensya sang pila ka tropang Pilipino sa Iraq. Amo pa man, pat-ud nga may kabaylo nga dalagku nga konsesyon nga igahatag ang rehimen sa amo sining imperyalista bangud daku nga sampal gihapon sa US ang pag-atras sang mga tropang Pilipino sa tunga sang sunod-sunod na nga pag-atras sang mga tropa sang daan nagasuporta sa gera kag okupasyon sang US sa Iraq.

Mahimo temporaryo nga makapahamot ang rehimeng Arroyo sa pumuluyo, pero magatuhaw kag magatuhaw ang matuod sini nga maka-imperyalista kag kontra-pumuluyo nga panindugan. Magasulod sa pamensaron sang banwa nga wala na kinamatarung magpabilin pa si Arroyo sa Malakanyang bangud padayon sini nga paantuson ang banwa sang anum ukon masobra pa nga tinuig.

Magabaskog ang paghandum sang pumuluyo nga tapuson na ang ila pag-antos. Padayon nga magalalla ang pagkahamulag ni Arroyo sa malapad nga masa sang pumuluyo. Maporma ang malapad nga paghiliusa sang pumuluyo nga magahangk sa padayon na pagpabilin ni Arroyo sa poder.

AB



Tuig XXXV No. 14 Hulyo 21, 2004

Ang Ang Bayan ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa Philippine Revolution Web Central nga makit-an sa:

www.philippinerevolution.org

Nagabaton ang Ang Bayan sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan

Editorial: Nagalala ang pagkahamulag sg rehimen	1
Pagpahilway kay Angelo dela Cruz	3
Paglapas sa tawhanong kinamatarung sa EV	5
Madinalag-on nga depensa sa Samar	6
Militarisasyon sa Quezon	7
Hilikuton pangkultura sa Panay	8
Polisiya pangluwas sg US	10
Balita	11

Ang Ang Bayan ginabantala duha ka beses kada bulan sang Komite Sentral sang Partido Komunista sang Pilipinas

Kadalag-an sang pumuluyo ang pagpahilway kay Angelo dela Cruz

Sining Hunyo 20, ginhilway na sang mga bumihag sa iya ang Pilipino nga drayber nga si Angelo dela Cruz, isa ka adlaw matapos iatras ang mga mersenaryong tropa sang Pilipinas sa Iraq.

Ginkidnap sa Baghdad, Iraq si Angelo dela Cruz sadtong Hulyo 7 sang mga myembro sang Khaled bin al-Waleed Corps, isa ka bahin sang Islamic Army nga nagabato sa okupasyon sang US sa Iraq. Suno sa mga bumihag, utdan ulo nila si Dela Cruz kon indi maghalin pag-abot sang Hulyo 20 ang 51-katawong tropang Pilipino nga nagasuporta sa gera pagpanalakay kag okupasyon sang US sa Iraq. Ang petsa nga gintalana sang mga gerilyang Iraqi mas



temprano sang isa ka bulan sangsa daan na nga gintalana sang rehimenng Arroyo.

Sa umpisa, gindeklarar ni Arroyo nga indi niya iatras sang mas temprano ang mga tropa. Mas ginusto niya nga isakpripisyo ang kabuhi ni Dela Cruz sa pagsuporta sa "gera anti-terorista" sang US kag pagmentenar sang maayo kag masinulundon nga pakigrelasyon sa iya imperyalistang amo.

Ginagamit subong sang rehimenng Arroyo ang paghilway ni Dela Cruz agud magpahamot kag isalbar ang nagsagyad nga popularidad sini. Walay huya nga ginaplano sang rehimen nga iparada si Dela Cruz sa State of the Nation Address agud pagguwaon kag ipabugal si Arroyo ang nagluwas sa kabuhi ni Dela Cruz.

Gusto nga tiplangon naman ni Arroyo ang banwa. Una sa tanan, ang nagbutang sa peligro sang kabuhi ni Dela Cruz kag minilyon nga iban pang Pilipino nga mamumugon sa Middle East amo ang lubos nga pagsuporta sang iya rehimen sa paglusob kag pag-okupa sang imperyalismong US sa Iraq. Subong naman, gusto nga angkunon ni Arroyo ang kadunganan sa pagsalbar

sa kabuhi ni Dela Cruz.

Ginapanindugan kag ginaliwatliwat lang sang rehimenng Arroyo ang napamatud-an na nga kabutigan ang ginamit nga rason sang rehimenng Bush sa pagpanalakay sang US sa Iraq. Napamatud-an nga daku nga kabutigan ang ginabangdan nanday Bush nga pagtago kuno sang *weapons of mass destruction* kag kaangtanan man kuno sa Al Qaeda sang pilit ginpukan sang US ang rehimen ni Saddam Hussein. Napamatud-an nga wala matarung ukon ligal nga basehan ang gera kag okupasyon sang US sa Iraq kag amo man ang hugot nga suporta diri sang rehimenng Arroyo. Wala gid lang sang iban nga nagakadapat kundi pagpauli sang mga mersenaryong tropang Pilipino.

Gintinguha sang rehimen nga pungan ang mga demonstrasyon sa karsada nga nagapamilit sa pagpauli sang mga mersenaryong pwersang Pilipino sa Iraq. Brutal kag wala hawid ang pagbungkag sang mga pulis sa mga protesta. Gintinguha man sang rehimen nga busalan ang masmidya kag iban pa nga pagpahayag sang pagpamatuk

sa rehimen.

Gintilawan man sang rehimen ang iban pa nga paagi, pati na ang pagpakignegosasyon kag pagsuhol sang \$6 milyon sa mga gerilyang Iraqi para mahilway si Dela Cruz nga indi na tani kinahanglan paulion pa ang mga suldadong Pilipino sa Iraq. Pero ginbalibaran ini sang mga gerilya.

Nagdaguob sa bilog nga banwa ang mga panawagan para sa gilayon nga pagpahilway kay Dela Cruz kag naglapnag ang mga protesta sang pumuluyo sa todo-todo nga suporta sa imperyalistang okupasyon sang US kag pagpadala sang mga suldadong Pilipino sa Iraq. Sa atubang sini, wala sang nahimo ang rehimenng Arroyo kundi iatras ang mga mersenaryong tropa, indi pa agud salbaron si Dela Cruz kundi agud isalba ang kaugalingon.

Sadtong Hulyo 12, nagpahayag si Arroyo nga paulion na sang mas temprano ang mga tropang Pilipino sa Iraq. Pag-abot sang Hulyo 19, nakauli na sa Pilipinas ang tanan nga tropang Pilipino halin sa Iraq.

Indi si Arroyo ang matuod nga

nagpahilway kay Dela Cruz kundi ang mabaskog, militante kag malapnagon nga paghimakas sang pumuluyong Pilipino para paulion halin sa Iraq ang mga tropang Pilipino kag isalba indi lang si Dela Cruz kundi pati ang iban pa nga yara sa peligro nga mamumugon nga Pilipino sa Iraq kag sa Middle East.

Ang paghilway ni Dela Cruz kadalag-an sang wala sang iban kundi sang pumuluyo batuk sa paltik nga "gera kontra-terorismo" sang US sa Iraq nga lubos ginasuportahan sang papet nga rehimeng Arroyo. Ang kadalag-an nga ini ginasaulog indi lang sang pumuluyong Pilipino kundi pati sang pumuluyong Iraqi kag sang tanan nga pumuluyo nga nagapamatuk sa paglapak sang US sa soberanya kag kahilwayan sang iban nga pungsod sa kalibutan.

Nadis-ayre ang US sa pag-atras sang mga tropang Pilipino sa Iraq ilabi na nga dugang na-

man ang Pilipinas sa nagadamu nga daan nagasuporta sa gera sang US nga nag-atras na sang mga tropa didto. Nauna nga umatras ang Spain, Dominican Republic, Nicaragua, Honduras, Norway, Moldova kat Singapore.

Ang Thailand kag New Zealand nakatalana nga mag-atras man sang mga tropa sa Septyembre. Nagpahayag man ang The Netherlands kag Poland sang plano nga mag-atras.

Suno sa mga tagapamaba sang gubyerno ng US, ang pag-atras sang mga tropa pagluhod sa mga terorista kag pagpabutyag nga mahimo nila ini liwat-liwatan pa sa palaabuton. Gusto nga takpan sang amo nga pahayag ang kamatuoran nga ang kadaluk kag agresyon sang numero uno nga terorista sa kalibutan-ang imperyalismong US-ang puno kag punta sang tanan nga kinagamu subong sa Iraq, sa bilog nga Middle East kag sa iban pa nga bahin sang kalibutan.



Pagbungkag sa rali, ginkundenar

Mabaskog nga ginkundenar ni Kaupod Luis Jalandoni, pinuno sang *negotiating panel* sang National Democratic Front of the Philip-pines (NDFP), ang mapintas nga pagbungkag sadtong Hunyo 13 sa rali nga nagainsister nga gilayon paulion sa pungsod ang mga sul-dado nga Pilipino sa Iraq. Suno kay Jalandoni, makaduluda ang integridad kag katampad sang gubyer-nong Arroyo nga padayunon ang sugilanon pangkalinungan bangud sa hayag nga paglapas sang mga *anti-riot police* sa Comprehensive Agreement on Respect for Human Rights and International Humanitarian Law (CARHRIHL. Siling ni Jalandoni, ginlapas sang mga pulisang Art. 2, Numero 12 sang CARHRIHL nga nagagarantiya sa hilway nga pagpahayag, pagpasakup kag pagtipun-tipon.

Ginpakamalaut man ni Jalandoni ang rehimeng Arroyo sa pagbutang sa peligro sa kabuhi sang minilyon nga OCW sa daw idu-idu nga pagsuporta sini sa ilegal nga okupasyon sang US sa Iraq kag pagpadala didto sang mga soldado kag mamumugon nga Pilipino.

Ginpangbatuta kag gindakup sang mga katapu sang Western Police District ang pila ka upisyal kag katapu sang Bagong Alyan-sang Makabayan (BAYAN) kag iban pa nga progresibong organisasyon sa mapintas nga dispersal sa Plaza Miranda. Nag-angkon diri sang daku nga pilas sa ulo si Dr. Carol Pagaduan Araullo, ikaduha nga pangulo sang BAYAN kag tagapamuno sang Plunder Watch. Upod sa lima nga gindakup kag ginhunong amo si Renato Reyes, tagapamaba sang BAYAN.

Mga kaso batuk kay Palparan, igapursiger

IGAPURSIGER sang Bayan Muna sa Department of Justice ang gilayon nga pagbista sa mga kaso kriminal nga ginpasaka kay Brig. Gen. Jovito Palparan, kumander sang ginpaatras nga mga tropang Pilipino sa Iraq, subong nga nakabalik na siya sa pungsod.

Nakapalagyo ang berdugo nga si Palparan sa pag-imbetiga sang hukuman sadtong nagligad nga tuig sang ginnombrar kag gintalana siya ni Arroyo nga mamuno sa Philippine "humanitarian contingent" sa Iraq.

Madumduman nga ginatos nga

kasong sang paglapas sa tawhanon nga kinamatarung ang natabo sa Mindoro sa sulod sang duha ka tuig nga nangin kumander siya sang 204th Infantry Brigade. Lakip diri ang pagpatay sa 18 katapu kag tagasuporta sang Bayan Muna. Tampok diri ang mga kaso sang pagpatay kay "Choy" Napoles, Jr., *coordinator* sang Bayan Muna sa Mindoro sadtong 2002 kag pagkuot kag pagsalbeyds kandy Eden Marcellana, upisyal sang KARAPATAN-ST, kag Eddie Gumanoy, lider mangu-nguma sang Timog Katagalugan sadtong 2003.

Nagalala nga paglapas sa tawhanong kinamatarung sa Eastern Visayas

Padayon ang pagsingki sang mga paglapas sa tawhanon nga kinamatarung sa Eastern Visayas bunga sang wala untat nga militarisasyon sa kaumhan.

Sa Eastern Samar, tatlo ka inosenteng sibilyan ang pinatay sang naga-operasyon nga mga pasistang suldado sining Hunyo kag Hulyo.

Pinakamasiligni nga kaso ang pagsalbeyds kay Rogelio Nuncio, 32, isa ka mangunguma nga taga-Barangay Tangbo, Maslog. Nakit-an ang iya nagadunot na nga bangkay sa sulod mismo sang kapilya sang barangay sadtong Hulyo 2 sang magbinalik ang mga mangunguma nga nagbakwit sang maglunsar sang operasyong militar sa ila lugar ang Charlie Company sang 14th IB. May igo sang bala sa iya sentido si Nuncio kag may labo sa ulo. Ginlukat man ang iya mata.

Ginpatay si Nuncio bangud lang nga may utod siya nga kilala nga katapu sang Bag-ong Hangaway sang Banwa.

Makaligad ang duha ka adlaw, wala kaluoy man nga ginpatay sang mga elemento sang pareho nga yunit si Bernardo Amado, isa ka mangunguma nga taga-Sityo Baynag, Barangay Can-ilay, Can-avid. Si Amado, nga may diperensya sa pamensaron, basta lang ginpasibangdan nga myembro sang BHB sang wala siya makasabat sa mga pamangkot sang mga suldado.

Sadto naman nga Hunyo 12, ginsalbeyds sang isa ka suldado sang 14th IB nga nagangalan "Garcira" kag duha ka elemento sang CAGU si Freddie Rebato, isa ka mangunguma nga taga-Barangay Tugas, Maslog. Nakit-an si Rebato nga nakadupa kag hugot nga nakagapos ang duha ka kamot sa isa ka

puno sang kahoy, dunot ang bagol kag tadtad sang pilas ang lawas.

Sa Samar, ginkuot kag iligal nga gindetenir sang mga suldado sang 34th IB kag 7th Scout Rangers Coy ang walo katawo halin sa Barangay Sto. Nino, Motiong sining Hulyo. Ang mga biktima nagalakip sang isa ka pamilyang mangunguma kag ang kapitan, isa ka konsehal kag duha ka tanod sang nasambit nga barangay nga nagkadto sa kampo militar agud pangitaon ang nadula nga pamilya.

Nagatrabaho sa ila ulumhan ang bilog nga pamilya ni Artemio Lazara, 39, sang mag-abot ang may 20 suldado nga nagaoperasyon sadtong Hulyo 4. Ginpatumtuman sang pusil kag pilit nila nga gin-upod si Lazara kag ang mga anak niya nga sanday Josephine, 13; Jocelyn, 12; kag Jonathan, 9. Isa ka Lieutenant Pensona kag Sergeant De Guzman ang nakilala nga upod sang yunit nga ato.

Pagkabuas, bandang alas-2 sang hapon, ginpangita ni Barangay Capt. Leonardo Gabane kag tatlo pa niyang kaupdanan ang pamilya Lazarra, pero gindetenir man sila sang militar.

Lima ka adlaw nga ginkaptan sang AFP ang mga biktima sang wala kaso nga ginpasaka sa ila. Ginbuhian lamang sila sang ginsugid ang insidente sa Katungod (tsapter sang Karapatan sa Eastern Visayas) kag sa *provincial chapter* sang Bayan Muna.

Antes ini, ginkuot man sang 34th IB sadtong Hunyo 27 si Libe-



rato Racab, isa ka mangunguma nga taga-Sityo Tar-as, Barangay San Miquel, Jiabong. Tubtub subong wala pa siya makit-an.

Sa Leyte, tatlong minutos nga ginpaarakan sang masinggan kag M14 sang mga tropa sang 19th IB sa pagpamuno ni Lt. Onofre Nelmidia ang 13 mangunguma nga pakadto tani sa ila palahuwayan sa Dinanawan, Ormoc City sadtong Marso 27.

Gindakup kag pilit maggiya sa operasyon ang pito sa ila-sanday Marcelo Custodio, 20; Orteliano Dador, 55; Reynaldo Dador, 33; Christopher Muya, 22; Macario Tumampo, 22; Crispin Tumampo, 25; kag Mario Cabacoy. Ginpangbakol sanday Cabacoy kag Dador. Nakadalagan naman ang anum pa nga iban.

Sa amo man nga adlaw, gindakup kag pilit man maggiya sang nasambit nga yunit militar ang tatlo pa nga mangunguma-sanday Jonie Polenio, Avelino Evan kag iya asawa.



Madinalag-on nga depensa sang BHB sa Northern Samar

Apat, di nalutos sang kwarenta

Sadtong Mayo 5, ginpakita sang mga Pulang hangaway sa Northern Samar ang mataas nga ikasarang sang BHB nga ipreserbar ang kaugalingon kag magtuga sang mabaskog nga bunal sa kubay sang kaaway. Armado sang apat ka *high-powered rifle* kag isa ka pistola, madinalag-on nga nakadepensa ang isa ka tim sang Rodante Urtal Command batuk sa 40 suldado sang 20th IB nga nagsalakay sa isa ka kampo sang BHB sa Barangay Palanit, San Isidro, Northern Samar.

Sa duha ka oras nga away, wala sang napatay ukon napilasan sa bahin sang BHB. Samtang, anum tubtub walo ang napatay kag lima ang napilasan sa bahin sang kaaway.

Bangud sa inagihan nga ini, mas nga nagtaas ang moral kag ikasarang mag-away sang mga Pulang hangaway.

Sadtong adlaw sang reyd, napulo nga Pulang hangaway ang yara sa kampo samtang ang iban pa nagahilikuton masa sa malapit nga baryo. Bandang alas-7 sang aga, yara sa mataas nga bu-

nyod malapit sa kampo ang duha ka kaupod sang makita nila nga nagapalapit ang mga suldado. Gilayon nila ginpalukpan ang mga ini, dungan hapa kag kober. Bumalos ang kaaway kag ginpaulanan sang bala ang nakakober nga mga kaupod.

Gilayon nga umaksyon ang iban pa nga hangaway nga yara sa kampo: pumusisyon sila para magdepensa, naghimos sang mga importante nga gamit, kag nagpadalagan sang isa agud magbulig sa duha nga nabulag nga kaupod.

Samtang wala pahuway nga nagapalupok ang kaaway, hilway nga nakaatras pabalik sa kampo ang tatlo ka kaupod. Didto madasig nga ginhimo ang konsultasyon sang mga yara sa pamunuan sang yunit kag gindesisyunan magtalana sang isa ka tim sang mga hangaway nga *magapin down* sa kaaway samtang nagaatras ang iban pa nga myembro sang iskwad.

Gilayon pumusisyon ang tim sang apat ka Pulang hangaway sa maayo nga tereyn, handa nga tiruhon ang sin-uman nga suldado nga magasulong. Ang ginakaptan nila: duha ka M14 kag duha ka M16. May dala man nga .45 pistola ang isa ka myembro sang tim.

Sa pihak sang ila

superyor nga numero, wala nakontrol sang 40 suldado ang away nga naglawig sang duha ka oras. Ginpakita sang mga nakigbato nga Pulang hangaway ang ila kaayo sa inaway gerilya, lunsay sa ihibalo sa tereyn kag mga taktikang kombatan. Disiplinado man sila sa paggamit sang bala-tig-isa ka magasin lang ang naubos nila sa bilog nga inaway. Pero epektibo sila nakapalupok kag nakamaniobra sa lain-lain nga pusisyon sa nga tuman nilang kabisado, tubtub sa dalayon nagamo ang kaaway kag naupangan ang anuman nga pagtinguha nila magsulong.

Pamatuod sang sobra nga pagkanerbyoso sang kaaway, pila ka beses nga nabatian sang mga kaupod ang singgitan sang mga suldado nga nagatumod sa pusisyon ku-no sang BHB. Pero ang matuod ginahamtangan sang kapareho nila nga suldado ang ila mga ginatumod. Gani sang ulihi, sila-sila na lang ang nagluthanganay.

Nagapabilin nga mataas ang ispiritu sa pagpakig-away sang mga Pulang hangaway. Samtang, mabaskog nga demoralisasyon sang mga suldado nga basta na lang ginapasulong sang ila mga upisyal, bisan maathag nga ginapatamaan sila sang mga Pulang hangaway. Tubtub sa dalayon nga pag-atras sang Pulang hangaway bandang alas-9 sang aga, wala ni isa sa ila ang naigo. Sa pihak nga bahin, sa tantya sang mga kaupod isa ang napatay kag lima ang pilason sa mga suldado. Suno naman sa mga mangunguma nga nagapuyo malapit sa lugar, walo ka sulda-



"Depensa", sundan sa pahina 7

Batuk sa mabaskog nga militarisasyon sa Quezon

Samtang ginapabilin sang rehi-meng Arroyo ang Southern Tagalog bilang "pungsodnon nga prayoridad" sa halambalanon sang pagbato sa mga rebolusyonaryong pwersa, masunod sa Mindoro ang prubinsya sang Quezon sa mga prubinsya nga ginasentruhan subong sang militarisasyon sa rehiyon. Malig-on kag epektibo naman ini nga ginabatuan sang mga rebolusyonaryong pwersa kag baseng masa sa prubinsya.

Permanente nga nakadeploy sa prubinsya ang 201st Bde nga may duha ka batalyon (74th kag 76th) kag 38 kumpanya sang CAFGU. Kadam-an sa mga tinawo sang 74th kag 76th IB amo mga daan nga tropa sang Scout Rangers nga hanas sa mga taktikang "*counterinsurgency*." Pulu-panahon, nagasimpon sa mga

operasyong militar sa prubinsya ang 59th IB nga nakabase sa Laguna. Dugang diri, tatlong kumpanya sang PNP Provincial Mobile Group (416th, 417th kag 418th) ang regular nga nagalunsar sang mga operasyon sa mga interyor nga bahin sang prubinsya.

Ginatum-ukan sang kaaway ang mga lugar diri nga ginaspetsahan base sang BHB kag may masami nga presensya sang hangaway sang banwa. Nagatum-ok man sila sa mga bahin sang kapatagan kag madamol ang populasyon, kag mga sentrong banwa kag kasyudaran kon sa diin mabaskog ang demokratikong kahublagang masa.

Pareho sa iban pa nga bahin sang pungsod, ginagamit sang AFP diri ang taktika sang "pagdumog," gamit ang dalagku nga pwersa. Gi-

nakinaiyahan ini pangunahon sang pagsimpon sang nagkalain-lain nga yunit sang AFP kag PNP sa mga operasyon kag paggamit sang nagkalain-lain nga paagi sa mas madasig nga deployment sang mga tropa sa lugar sang inaway.

Kadungan sang dalagkuan nga madasigan nga mga operasyon militar, ginpabaskog sang AFP ang mga pwersang teritoryal. Gintukod man ang madamo nga kampo, lapnagon nga rekrutment para sa CAFGU kag nagalatag sang malapad nga lambat-paniktik paagi sang Barangay Intelligence Network sa tuyo nga mahawanan kag mabantayan ang lugar.

Ang tanan nga ini malig-on nga gin-atubang sang BHB kag rebolusyonaryong pumuluyo sang Quezon. Aktibo nila nga ginabatuan ang nagapadaku nga operasyong militar sa mga prenteng gerilya kag ang kadungan nga mga pagpang-atake sa demokratikong kahublagang masa.

Sa pihak sang kusog kag kadamuon sang militar sa prubinsya kag mga ginalunsar sini nga mga dalagku nga operasyon, indi lang napreserbar sang BHB ang kaugalingon kag ang baseng masa sini, nakatuga pa ini sang mabaskog nga bunal sa kaaway.

Halin mayo tubtub Hunyo sining tuig, apat ka dalagku nga operasyon sang militar ang ginpaslaw sang mga pwersa sang BHB. Ginpakita sa sepa-



"Depensa," halin sa pahina 6

do ang patay ukon pilason kag ginapas-an sang ila kaupdanang palayo sa inaway.

Sadtong masunod nga mga inadlaw, daku nga kakibot kag kaladlawon sang mga kaupod kag

mangunguma nga nakahibalo sang matuod nga hitabo sang magpabugal sa masmidya si Maj. Gen. Glen Rabonza sang 8th ID nga nakapatay kuno ang mga tropa sang 20th IB sang pito ka Pulang hangaway. Ang matuod, luwas sa wala kaswal-

ti amo nga wala sang iban nga nakuha ang kaaway kundi isa ka nabilin nga magasin sang 9 mm kag duha ka *generator* nga nakit-an man sang balikan sang mga sulda-do ang kampo kag naggamit sang idu sa pagpangita. AB

rado nga inaway nga ini ang ikasarang magdependa kag magbato sang BHB. Napangibabawan sang relatibo magamay nga yunit gerilya ang masa dalagku nga pormasyon pangdumog sang AFP. Samtang nagadamu ang pasistang tropa nga nagasulod sa sakup sang rebolusyonaryong hublag, nagadamu man ang target sang mga taktikal nga opensiba sang BHB.

Sadtong Hunyo 20, nakaengkwen-tro sang Maria Theresa De Leon Command (MTDLC) ang mga elemento sang 74th IB nga naga-operasyon sa lindero sang mga banwa sang Mulanay kag San Francisco. Nagasaylo ang mga Pulang hangaway sa masunod nga baryo sang makita nila nga nagapahuway sa kilid sang sapa ang militar. Gilyon nila ginpalukpan ang mga tropa sang kaaway kag napatay ang tatlo sa mga ini. Ang yunit militar nga ini ang may mahaba nga listahan sang paglapas sa tawhanon nga kinamatarung sa Far South Quezon.

Bag-o ini, hinaras sang MTDLC ang mga naga-operasyon nga tropa sang 74th IB sa Barangay Taingon, San Francisco, Quezon. Apat ka elemento sang AFP ang napatay. Wala makabalos sang lupok ang pwersa

sang AFP. Dala sang mabaskog nga demoralisasyon, nagbinalik sa ila kampo ang iba pang naga-operasyon nga yunit sang 74th IB.

Sadtong Hunyo 16, napaaway ang isa ka yunit sang Apolonio Mendoza Command (AMC)-BHB sang ambuson sila sang isa ka platon sang 74th IB sa Barangay Nanandiego, Mulanay. Nag-abot sa tatlong oras inaway pero naagaw sang mga Pulang hangaway ang inisyatiba sa una nga hugnat pa lang sang linupok. Gilayon nga nag-atras ang tropa sang AFP amo nga nakaasolt ang mga kaupod kag natabog sa nagakalain-lain nga direksyon ang pwersa sang militar.

Epektibo man nga napunggan sang *blocking force* sang BHB ang reimporsment nga sakay sang isa ka *armored personnel carrier* kag duha ka siksabay. Ginpalukpan sang BHB sang isa ka *command-detonated land mine* ang nauna nga trak sa ila komboy.

Nakaagaw sang isa ka M16 ang BHB. Napulog lima ka militar ang napatay kag di maisip ang pilason. Sa nagkalain-lain nga lugar ginpagguwa sang mga suldado ang ila mga patay kag pilason nga kaupdanang agud ta-

bunan ang ila kahuy-anan.

Ginpagguwa nila sa midya nga isa lang ang napatay kag tatlo ang napilasan sa militar.

Samtang, napilasan ang Pulang hangaway nga si Renato Vergara ukon Ka Medel. Namatay siya samtang ginaatras sa lugar nga inaway.

Sadtong Mayo 5, ginreyd sang 70-katawong komposit nga yunit sang 59th IB, 74th IB kag 76th IB ang isa ka pinadaku nga platon sang AMC nga nakakampo sa Barangay Anyaw, Catnauan. Nakabato ang mga Pulang hangaway kag gilayon nga nakahalin sa kordon sang kaaway. Sa amo pa man, lima ka hangaway ang namatay sa proseso sang pagdependa.

Apat ang gilayon nga napatay sa bahin sang AFP, lakip ang isa ka Lt. Ferrer, ang kumander sang nagsalakay nga yunit. Suno sa mga residente sa lugar, maabot sa 16 ang napatay nga kaaway. Pareho sang ginhimo sa Mulanay, likom nga ginpagguwa sang militar ang mga bangkay kag pilason sa kaiping nga banwa sang Catnauan kag ang iban ginsakay sa helikopter agud indi mabal-an sang tagabaryo kag sang midya ang matuod nga numero sang mga kaswalti. AB


Nagasublak liwat ang rebolusyonaryong hilikuton pangkultura sa Panay

Nagapagsik subong ang rebolusyonaryong hilikuton pangkultura sa Panay makaligad ang masobra isa ka dekada nga paghina sini. Madamu nga nagalapanag subong nga balasahon halin sa rehiyon nga nagaunod sang mga binalaybay, ambahanon, anekdota, malip-ot nga sugilanon, komiks kag dibuho. Nasuguran man ang paghimo sang mga bidyo dokumentaryo.

Sadtong Pebrero 2004, liwat ginpublisar ang *Sublak*, isa ka rebolusyonaryong magasin pangkultura sa rehiyon. Nagtakup ini sadtong 1989 sang nangibabaw ang sala nga linya sang adbenturismong militar

kag insureksyunismong urban kag napabayaan ang hilikuton pangkultura. Tuyo sa liwat nga pagpagguwa sini ang pagpopularisa sang mga rebolusyonaryong handum kag inagihan sang mga Pulang hangaway, masang anakbalhas kag iban pa nga demokratiko kag patriyotikong sektor paagi sa literatura kag taliambong.

**Koleksyon
sang mga amba-
hanon kag bi-**



nalaybay. Natulunga sa apat ka bahin ang bag-o nga edisyon sang *Sublak*.

Sa una nga bahin, may 23 binalaybay nga nakasulat sa Hiligaynon kag iban sa Ingles kag Pilipino nga may nagakaigo nga salhin. Maobserbahan nga kadam-an sa mga nagamot sang ila mga binalaybay bagong sublak nga mga manunulat-mga kadre sang Partido, upisyal kag Pulang hangaway, mga organisador sang mga mamumugon, mangunguma, mangingisda, imol sang syudad kag pungsodnon nga minorya.

Ginabug-os sang apat ka *ambahanon* ang ikaduha nga bahin. Sa estilo sang popular kag tradisyunal nga komposo, sugidanon ukon ismayling, epektibo nga napabutyag sa "Igpahu," "Kasaysayan sang Baryo," "Grupong Binuligay" kag "Ambus sa Malinao" ang mga balatyagon kag handum kag paghimakas sang pumuluho sa pagpasulong sang rebolusyong agraryo, pagpauswag sang produksyon kag pagpamatuk sa militarisasyon, pwersahang ebakwesyon, pagpang-agaw sang duta kag ang kaisog sang BHB, dungan ang pagbuyok nga mag-upod sa nagalapad nga kubay sang pungsodnon-demokratikong kahublagan. Gindihon ang mga ambahanon nga ini sang mga grupong pangkultura sang BHB sa Central kag Southern Front.

Mga sugilanon. Nagaunod sang duha ka malip-ot nga sugilanon ang ikatlong bahin. Ginalaragway sang *Dalugdog sa Septyembre* ni Rio Roja ang praktika sang isa ka bag-ong tukod nga SYP sa Northern Front sadtong temprano nga bahin sang dekada 1970 halin sa wala-eksperensya sini sa pagtukod sang base kag hangaway sang banwa tubtub sa pagambus sa kaaway sa una nga kahigayunan. Ginpalab-as naman sang *Tinipik sang Kasaysayan* ni Maya Mor ang pagmasaker sang mga pasistang tropa ni Magsaysay sa 37 kadre, kuman-

der kag katapu sang Hukbong Mapagpalaya ng Bayan (HMB) nga nagapulong sadtong Abril 27, 1953 sa Taruytoy, Libacao, Aklan. Duha sa mga nakalibre diri, sanday Kumander Coronacion "Waling-Waling" Chiva kag asawa niya, ang nagtungod sang daku nga papel sa pagpapalapad sang BHB sa Border Area sang Iloilo-Capiz-Aklan sadtong 1972.

Katapusan nga bahin sang *Sublak* amo ang komiks bahin kay "Caduy," ang bata nga nangin popular nga karakter sa komiks nga nagsugod guwa sadtong 1982 sa mga pahina sang *Daba-Daba*, ang pahayagan pangmasa sang rehiyon.

Rebanek. Indi sa tanan nga oras seryoso ang mga rebolusyonaryo. Sa matag-adlaw nila nga kabuhi-kag-kamatayon nga paghimakas, madamu man nga nagatuhaw nga kaladlawan nga insidente, hungod man ini ukon indi. Agud kuhaan sang mga leksyon, gintipon ang mga ini nanday Rubio Rus Lucha kag Maya Mor sa 44 dagli kag gintig-uluhan nga *REBANEK* ukon mga rebolusyonaryong anekdota.

May iban pa nga koleksyon sang mga sinulatan pareho sang *Poems, The Enemy's Son and Other Poems from the Warfront* (23 binalaybay) kag *Hiwaylaybay nga Walay Prosodyo* (30 binalaybay)-tanang ni Maya Mor kag *Pila ka Binalaybay kag Ambahanon ang akan Gin-giklanan* (mga sulat, ambahanon kag binalaybay) ni Bayani Obrero.

Ginalauman sa liwat nga pagsublak sang rebolusyonaryong hilikuton pangkultura nga madamu pa maenggan-nyo kag makakita sang tinion nga magpahayag sa maarte nga paagi sang ila ginabatyag bahin sa kaugalingon, sa mga ginapalangga, sa katilingban kag sa rebolusyon bisan sa tunga sang pagpakigsumpong sa kaaway kag pagtungod sang nagkalain-lain pa nga praktikal nga hilikuton sa rebolusyon. AB

Malip-ot nga bidyo

Sadtong Marso 2003, ginhi-mo sang mga kaupod sa Panay ang isa ka malip-ot nga pelikula nga *Panait sang Tumanduk*. Sa pulong nga Kinaray-a, ang buot hambalon sini amo nga ritwal sang mga ambahanon kag saot sang mga Tumanduk para sa ulan kag buganang ani.

Ginatalakay sa masobra 20 minutos nga bidyo kon paano madinalag-on nga nahugpong ang mga Tumanduk sa lindero sang Aklan-Capiz-Iloilo batuk sa pagpanghakab sang 3rd Infantry Division sang Philippine Army sa 33,310 ektaryang kadutaan nga ginpanubli pa sang mga Tumanduk halin sa ila mga katigulangan.

Ginbalikan sini ang epikong bayan sang Panay bahin sa pagpakig-away ni Labawdungan sa mga banyaga. Naglab-ot ang pagsaysay sa pagsugod sang hilikuton pagorganisa sang BHB sa mga Tumanduk kag kon paano umpisa 1973 tubtub subong ginakabig na nga katuwang sang mga Tumanduk ang BHB sa paghimakas para bawion ang ila ginpanubling duta.

Pamatuod sang hugot nga paghiliusa sang mga Tumanduk kag sang BHB ang paguswag ni Ka Bob (Ismael Giganto), halin sa kabataang aktibistang Tumanduk nga nakigbato para sa kinamatarung sa duta sang ila tribo tubtub nangin responsableng kadre sang Partido kag Pulang kumander sang BHB. Namartir si Ka Bob sa isa ka madinalag-on nga ambus batuk sa SOT sang Task Force Panay sadtong Pebrero 2003. AB

Mahimo mabasa ang nasambit nga mga sinulatan sa seksyon pangkultura sang Philippine Revolution Web Central @www.prwc.org.




Nagabaskog ang pagpamatuk sa polisiya pangluwas sang US Asud-asod nga mga bunal

Nagalala ang pagkahamulag sang US sa internasyunal nga komunidad bunga sang indi matarung nga polisiya pangluwas sini ilabi na angot sa sitwasyon sang Middle East. Asud-asod nga mga bunal ang gin-angkon sang gubyernong Bush sining mga nagligad nga simana sa patag sang ligal, pulitika kag diplomatiko lunsay halin sa sulod kag guwa sang pungsod.

Madumduman nga sadtong 2002 kag 2003, madinalag-on nga napamilit sang US sa UN Security Council nga hatagan ini sang tig-isa ka tawong *immunity* o paglibre sang mga suldadong Amerikano sa pagbista sang International Criminal Court (ICC). Ang ICC amo ang pangkalibutanong hukmanan nga gintukod sandig sa isa ka internasyunal nga tratado sadtong 1998 agud bistahon ang mga kaso sang henosidyo, krimen sa gera kag sistematikong pagpang-abuso sa tawhanong kinamatarung. Tuyo sang US sa pag-

insister sang *immunity* ang mapabwelo sang lubos ang agresyon sini sa Afghanistan, Iraq kag iban pang pungsod buot sini sakupon. Nakuha sang US ang amo nga *immunity* sa pamahug nga balabagan sini ang ginasiling nga *peace keeping operations* sang UN kon indi sini makuha ang gusto.

Ugaling subong nga tuig, wala sang mahimo ang US sa atubang sang mas mabaskog nga pagpamatuk sang mga myembro sang konseho sa ginapangayo nga panibag-ong isa ka tuig nga ekstensyon sang *im-*



munity. Sa pulong sang konseho sadtong Hunyo 24, mabaskog nga ginpabutyag ni Kofi Annan, Pangkalibugan nga Sekretaryo sang UN, nga indi na pwede tugutan ang amo nga ekstensyon sa atubang sang nabuyagyag nga mga pagpang-abuso sang mga tropang Amerikano sa mga bilanggong Iraqi sa Abu Ghraib.

Partikular nga nag-ani sang pagpamatuk ang hingyo sang US nga liwat aprubahan ang kada tuig nga *immunity* "tubtub kinahanglanon." Ginkundenar ini ni Annan bilang isa ka tuyo nga himuon permanente ang isa ka temporaryo nga tikang pang-emerhensya.

Samtang, sa US mismo, may upisyal na nga pag-ako sa wala-basehang gera sang US sa Iraq. Sa report nga ginpagguwa sang US Senate Intelligence Committee sining Hulyo 10, ginbuyagyag sini ang pagka-"depektibo" sang mga datos paniktik nga ginbasehan sang desisyon nga salakayon ang Iraq. Suno diri, ang mga kongklusyon sang US angot sa *weapons of mass destruction* (WMD) sang Iraq sobra ukon indi suportado sang mga report paniktik. Ginhimo tapalan sang gubyernong Bush ang kuno mga WMD sang Iraq para ilunsar ang agresyon.

"Mga bunal," sundan sa pahina 11

Iligal ang "Security barrier"-ICJ

NAG-ANI man sining karon lang sang kapaslawan sa korte ang gubyerno sang Israel, nga pangunahong alyado sang US kag katuwang sini sa pagpatuman sang imperyalistang agresyon sa Middle East.

Gindeklarar sang International Court of Justice (ICJ) sining Hulyo 9 nga iligal ang pagtukod sang "security barrier" sang Israel sa sulod sang West Bank. Ang ICJ, nga ginatawag man nga World Court, ang pinakamataas nga awtoridad hudisyal sang UN. Ginsiling sang ICJ na "katumbas ini sang pagpanakup" kag nagakadapat kuno nga untaton gilayon ang konstruksyon kag gub-on na ang pader.

Ang pagtukod sang nasambit nga pader hayagan nga ginasuportahan sang US kag UK. Nauna na nga nagpabutyag ang duha ka imperyalistang pungsod nga indi dapat makapasilabot ang US sa nasambit nga halambalanon. Sa 15 huwes sang ICJ, solo si Thomas Buergenthal sang US ang nagkontra sa desisyon.

Bisan indi maobligar ang Israel nga magsunod sa desisyon sang ICJ, kag sa kamatuoran hayag sini ginasupak ang husga, may daku nga kabilinggan ang desisyon ilabi na ang nasambit nga kaso ginpasaka indi lang sang Palestine kundi sang General Assembly ukon bilog nga kapulungan sang UN. Ginaprubahan sang desisyon sang korte ang matarung nga basehan sang pagpamatuk sang mga pumuluyo kag pungsod sa kalibutan sa pagpamigos sang Israel sa Palestine kag pagsuporta sang US diri.

AB

Abusado nga mga tropa, ginapalayas sa Negros

GINAPAPAMILIT sang mga mangu-nguma halin sa Barangay Kalupanan, Trinidad kag Mani-ak sa Guihulngan, Negros Oriental ang gila-yon nga pagpapalayas sa mga abusadong militar, pulis kag pwersang paramilitar sa ila lugar.

Suno sa Kaugmaon-KMP, isa ka organisasyon sang mga mangunguma sa Guihulngan, ang kalakasan sa mga sibilyan naggrabe pagkatapos sang engkwentro sang AFP kag Bag-ong Hangaway sang Banwa sadtong Hunyo 12 sa Barangay Tacpao, Guihulngan kon sa diin isa ka suldado kag duha ka Pulang hangaway ang napatay. Ang mga abusadong tropa, siling sini, naghalin sa 11th kag 12th IB, PNP *regional mobile group* kag Revolutionary Proletarian Army-Alex Bongcayao Brigade.

Ginpakamalaut sang Kaugmaon-KMP ang kahadlok kag perwisyo nga ginatuga sang pagbantay pirme sang mga suldado sa mga lider mangunguma kuno nga nalakip sa listahan sang militar. Bangud sini, siling sang Kaugmaon, indi na makapangita ang mga mangunguma bangud sa nagakahadlok na sila magkadto sa ila mga uma. Ginkundenar man sang mga mangunguma ang pagsamad sang mga suldado sa ila mga pananum kag pagsulod sa ila mga balay nga wala pahanugot.

Bayad-danyos sa mga biktima sang layi militar, ginbalewala sang rehimeng Arroyo

GINPAHIGAD sang Malakanyang sadtong Hulyo 14 ang mandu sang isa ka US *federal court* sa Honolulu, Hawaii nga isaylo ang \$40 milyon sa \$684 milyon nga parte sang ginkawat nga manggad sang mga Marcos, pakadto sa *bank account* nga ginbuksan para sa mga biktima sang pagpang-abuso sa tawhanon nga kinamatarung sa idalum sang dikta-duryang Marcos. Ang \$40 milyon kabahin sang danyos nga napain para sa halos 10,000 biktima nga nagdaug sadtong 1995 sa kaso nga ginpasaka nila sa US batuk sa mga Marcos.

Madumduman nga isa sa mga rason sang pagpangluya sang National

Democratic Front of the Philippines (NDFP) sa ikatlong *round* sang pakignegosasyon sini sa GRP sadtong Hunyo ang wala-aksyon ni Arroyo kaangot sa promisa niya nga aregluhon ang danyos nga napadaug sang mga biktima.

Ang pagsupak sang rehimeng Arroyo sa mandu sang korte sa US may kaangtanan man sa pagpakig-aregluhanay subong ni Arroyo sa mga Marcos. Nagapangita man si Arroyo sang pondo nga pagagamiton para punan ang wala untat nga pagtaas nga depisit sa badyet sang gubyrno kag pondohan ang iya pahabok nga 10-punto nga programa, mga gasto militar kag iban pa.

US, ginpakamalaut sa kumperensya bahin sa AIDS

GINPAKAMALAUT sa internasyunal nga kumperensya bahin sa AIDS nga ginhiwat sa Thailand sadtong Hulyo 11-16 ang mga polisiya kag tikang sang US nga nagasablag sa pagpalapnag sang mga barato nga bulong batuk sa HIV, ang mikrobyo nga bunga sang AIDS.

Ginkundenar sang mga delegado sa pagtilipon ang mga bilateral nga kasugtanan nga ginasudlan sang US agud protektahan ang interes sang mga kumpanya sang bulong, baliskad sa isa ka internasyunal nga kasugtanan nga gin-aprubahan sang World Trade Organization sa Doha, Qatar sadtong 2001. Sa idalum sang

kasugtanan, hilway ang mga imol nga pungsod nga indi sundon ang mga *patent* sang mga kumpanya sang bulong agud makabakal sang mas barato nga bulong batuk sa AIDS kag iban pa nga balatian.

Ang kasugtanan sa Doha sadtong 2001 ang nagguba sa hugot nga kontrol sang mga higante nga multinasyunal sa produksyon kag pagbaligya sang mga bulong batuk sa HIV. Nakabulig ini sa pagpanubo sa bili sang pagpabulong sang HIV halin sa masobra \$10,000 (P55,000) kada tuig pakadto sa isa ka dolyar (P55) ukon mas manubo pa kada adlaw.

"Mga bunal," halin sa pahina 10

Suno kay Sen. Jay Rockefeller, isa ka mataas nga myembro sang nasambit nga komite, ang gintumod nga kasaypanan "kabahin sa pinakamapanghalit nga kapaslawan sa paniktik sang US."

Ang report sang US Senate ginpamatud-an man sang isa ka upisyal nga imbestigasyon sa United Kingdom. Sining Hulyo 14, ginbalita sang komisyon nga naghimo sang imbestigasyon sa UK ang kongklusyon sini nga ang Iraq wala sang

mga armas kemikal kag *biological* sadtong lusubon sini ini sang koalisyon nga ginpamunuan sang US. Ginhayag sang komisyon nga ang mga datos paniktik sang UK angot sini "depektibo, indi masaligan kag indi bastante."

Editorial

Nagalala ang pagkahamulag sang rehimeng Arroyo sa pumuluyo

Padayon nga nagakahamulag sa pulitika si Gloria Arroyo bangud sa iya garuk kag brutal nga pagginahum kag sa nagalala nga kahalitan kag kaimulon nga ginatuga sa pumuluyo sang wala kutod niya nga pag-ikog-ikog sa imperyalismong US. Indi madula ang daku nga duda sang madamu nga pumuluyo sa iya pagdaug sa eleksyon. Ginakaakig sang pumuluyo ang pagtapna sang rehimen sa mga pagpahayag sang protesta sa nagligad nga tuman kahigko, pinakamada kag pinakamapintas nga piniliay sa bug-os nga kasaysayan sang mga reaksyunaryong eleksyon sa Pilipinas. Labing ginkaakig sang banwa ang paglapak subong sang rehimen sa interes sang hustisya kag sang pumuluyo para sa pagkakig-"rekonsilyasyon" kanday Estrada, sa mga Marcos kag iban pa nga ginhusgahan na sang pumuluyo bangud sa ila mga makangingil-ad nga krimen batuk sa banwa.

Adlaw-adlaw nagadamu pa ang pumuluyo nga nakumbinse nga tuman kadaku nga pabug-at sa masa ang pagpadayon sa daan na nga mga maka-imperyalistang polisiya sa ekonomya nga lubos kapagsik na-

man nga ginapatuman sang papet nga rehimen. Nagserbi lang ang mga polisiya nga ini sa mga imperyalistang kumpanya nga dalok sa supertubo. Ginakuga sini ang mga lokal nga negosyo, ginaguba ang mga produktibong pwersa, ginabayaan nga atrasado ang pungsodnon nga ekonomya kag pinakamalaut ang kaimulon sang pumuluyo.

Ang neoliberasasyon kag katuwang sini nga pagbaha sang mga ginangkat nga produkto nagasampaw sa mga lokal nga produkto ang resulta lunsay sang labing pagtibusok sang lokal nga agrikultura kag mga negosyo kag sang lapnagon nga disempleyo kag kaiwaton sa bilog nga kapuluan.

Ang mas malala nga laragway sang disempleyo kag pagkabangkrap sang ekonomya sa Pilipinas nabuhinan lang sang pagluwas sa iban nga pungsod sang masobra walo ka milyon nga Pilipino para didto mangita



trabaho.

Ang layi sa deregulasyon sang industriya sang langis ang rason sang wala untat nga pagtaas sang presyo sang mga produktong petrolyo kag libre katama nga paghugakum sang malahigante nga tubo

Mga tampok sa isyu nga ini...

Pagpahilway kay Angello dela Cruz
PAHINA 3

Madinalag-on nga depensa sa Samar
PAHINA 6

Rebolusyonaryong hilikuton pangkultura
PAHINA 8

Mga instruksyon sa pag-imprenta

1. Ang **pahina 11**, nga eksakto nga kopya sang pahina 1 maluwas sa mas malus-aw ang *masthead* ukon *logo* amo ang para sa mga nagagamit sang *mimeo machine* ukon naga-imprenta paagi sa *v-type*. Gindisenyo ini para indi madali masamad sang istensil.
2. Pag-imprenta sa istensil:
 - a) Sa *print dialog*, i-check ang **Print as image**
 - b) Kuhaon ang *check* sa **Shrink oversized pages to paper size**
 - k) I-click ang **Properties**
 - d) I-click ang **Advanced**
 - e) Siguruhon naka-set sa **100%** ang **Scaling**
 - g) Padayunon ang *pag-print*
3. Ginabuyok ang mga kaupod nga ipaabot sa patnugutan sang *AB* ang anuman nga problema kaangot sa pag-imprenta paagi sang *v-type*. Magpadala sang *e-mail* sa *ang-bayan@yahoo.com*